

PAPARA 1

1: 1-25 PAUTO AUERO RUTU PURAREVA

1-5. Vo tuariri rovoaia Pauto vuvuiua ora rasito pura-rovoreva. Vo osia rasito raga toureva, uva viapau oavu avuvai. Oire Pauto urauraaro tuepaepa aue ivaraia uukovi. Vara rutuia rupa toupai. (3) Oa iava Pauto oisio puraroepa, "Aviavia rorove." Oire aviavia rorova. Uva Pauto tarairoepa oisio aviavia vearopai, uva va vaisireva oisio Avi Voki. Oire varei rovirieireva oisio oavua rupa voki ora oavua avi voki. Eva rovopa voki rutu. (6-8) Pauto reoroepa uva rukuta vuvutauvira kaeoviropa uukovi ivara iava viara iare. Uva Pauto voa vaisireva va iava vo vuvuiua. Evaia eraopa voki.

9-10. Oire Pauto reoroepa uva avaka

Jenesis 1

rovu ora uupieepa osia rasito karekeroepa.

11-13. Oire Pauto reoroepa osia vegoara rutu kovaepa aue ivaraia rasito. Oire vosia rovoaia katai ova purareva, uva kuepa. Oa iava va kuearo koveepa rasitoa iare. Oire kovaepa vorevira. Eisi raga ora pieoro purapiropa vegoa rutu. Eva vo pevapa voki.

14-19. Oire Pauto reoroepa uva vara rutu karekeepa ravireo ora kekira ora visiurikoara rutu. Oisio ragavira va purareva ravireo vo karekepasia avi vokiia ari aue kekira ora visiurikoara vo karekepaperea vokiaro. Oire va iava aviavia ora vaea iva siovaraia auero vuutara rovirieireva. Evaia vo resiurapa voki.

20-23. Pauto reoroepa uva aue kare rutu puraviropa vo uukovi atari kare. Va iava oisi raga ora kavakavauaepa, oa iava ora rigaaepa ora puraoro. Oire Pauto vo kare rutu purareva kokio kare. Oa iava ora rigaaepa. Evaia vo vavaepa voki.

24-25. Oire Pauto reoroepa uva kore kare rutu puraviropa, varuere kare ora

viropa kare puraaepa rovoaia rasitoaia. Vo kareo tapo okarea riruvira vokapai vo rasito oisio osia rakoru kare. Oire vo kare rutu evo kare purareva. Oa iava ora rigaaepa kavakavauoro.

(1: 29-30; 2:9a). Pauto vegoara aiopara rutu vatereva voeaopa oea rasitoaia tootoopai vo.

1: 26-2: 25 PAUTO OIRATO PURAREVA

1: 26-2: 25. Pauto oirato purareva. Vaiterei rutu ora riakova aiterea purareva. Uva oisio raga vaiterei purareva osia rera.

PAPARA 2

Pauto rasia oureva oirato purasia. (7) Oire voava Pauto oirato iruvaoroia vavauroepa. Oa iava tootooroepa oirato. Oire rera oirato vaisireva oisio Adam. Oire Pauto kovoa oaa vo touva uukovi kukukuaro vo rasioia vo Iden. (9) Vo vuraua vuruvuruia rutu vo kovoa siovaraia tootoopa ova oisioa toupai. Vosia irai vo eva kuearo aioreve, ra tootooparo. Viapau opesiavai. Oire oevavu tapo oisioa toupai, tarai oupa

Oire uva waitereia waitereo areivira toupasiveira. Pauto waiterei tavireva kakae purapasiei ra vara rutu auero tokipata. Uva oisioa gapuvira toupasi. Viapau tuuavai. Ora viapau aariavai. Oire Pauto vara rutuia vurapareva varao oara purareva. Vara rutu eveipareva oisio vearovira toupai. Evaia katai vatarapa voki. (2) Vara rutu opesipierevoiva kovoara tuereva vo erao vatarapa vokiia. Oa iava oisio vo voki vaisireva Iguvapa Voki.

PAPARA 3

3: 1-24. OIRATO VURIA PURAREVA

1-7. (1) Iravu rakoruto riro taraito. Uva eera ira riakovare oisio puraroepa, "E, Pauto vi tavirevora oisio ra viapau auero rutu kuearo aiopasi varao kovoa siovaraia?" Oire riakova oisio puraopa, "Vegei uvuipaveiei vo kuero kuearo aiopasia ari kataia raga vao vuruvuruia rutu toupai oa viapau kuearo uvuipai ra va aiove. Vosia va kuearo aiove ora va getegeteve ra kopive." Uva aue rakoruto oisio puraroepa, "Viapau oisio ra kopisi. Pauto vaia taraipa vo osia vo evao kuearo

Jenesis 3

aiosi ra vearoaraia taraisi ora vuriara. Oire va iava Pauto oisio puraroepa, "Opeita kueara aiopasi." osia puraroepa rakoruto. Oire uva riakova vuraeva, uva ruipaopa kuepa. Oire aisivu oueva vaisi aiosia. Uva vatuato vateva. Oa iava vaisi aioreva, uva vaiterei rutu auero rutuia taraisiepa. Oa iava ora kekesiepa. Oa iava oisio purasiepa, "O, ari gapuvira toupave." Va iava evao guruvaaro turusiva aue puraoro sikure tuupasia ora vaitereipa.

8-12. Vo ovaiaro vo osia ravireo rokoreva uva Pauto vokapareva aueia kovoa. Oire uva Adam vaio ora rera vatuavaaro rera uvusiva. Oa iava vatausiepa kovarua siovaraia. Pauto keraroepa, "Vaitereo, ovu veiei?" Oirato rera vo reoaro pukoreva, "Ragai vi uvuavo, ari gapuvira toupaa. Oa iava uririparai uva vataurai." Oa iava Pauto oisio puraroepa, "Irouto vi tavirevoiva? E tugoropa ova kuearo aiorivo?" Ovoiei, Adam oisio puraroepa, "Vi ragai vaterivo oia riakova. Iria ragai vateevo vaisio, oa iava vaisi aioavoi." (13) Uva riakova oisio puraopa, "Rakoru irai ragai

Jenesis 3

kearevo, oa iava vo kue aioavo." Oa iava Pauto rakorure oisio puraroepa, "Oire vi vigoa vao purari rakoru vigoa riruvira vokaparivera. (15) Ragai oisio piepaavera, vi rakoru vigoa ovi iraraaro ora riakova ovi iraraaro oea ora aveavepaavera vokiara rutuia. Vi rakoru rera kokotuoaro vuripierivera, ari rera vi kukuearo tarururevera." Oire Pauto oisio puraroepa riakovare, "Vi rirovira upiapauvera kakae kavaupaoro. Rerapa oiratoa oara ruipapauvera, uva vi tokiparevera. (17-18). Pauto oisio puraroepa Adamre, "Uvare vao purari, uva oisio piepaa veire, ragai varao kovapie-ragapaa vo rasito kouara. Oire aue raga iava vara kuearo aiorivere virikasi kovo. Vi varao puraparivera vo toupaooro vokiara rutuia. Oire ari aue iava rasia vi puraavora, uva vorevira voreuvere rasia purasia." Oire uva vo kareo varuere kare rakariaro iava varoara purareva Pauto waitereipa ora rakurakusia. Uva Adam vatuavaia vaisia tovoreva oisio Ivi. Uva oirao iria oisio karekeoviropa aakova oaive oirara rutu.

Jenesis

22-24. Oire aue Adam vaio ora Ivi oisio taraisiepa eake vearovira toupai ora vurivira. (22) Uva auepa vaiterei korupiereva kovoa iava. Teapi oirara tootoopa ova kuearo aioive. Oire uva Pauto uutupa irara tovoreva tootoopa ovaia ora sigoa tuituipa oa tapo tovoreva uutuvira. Oire uva vo avukarei vearo kovo arua kovo kavusiva. Voava vaiterei vo kovoaro rovosiva vo rasito.

Language. The abridgement was prepared by the Summer Institute of Linguistics.